



## Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

### Пренумерата в краю:

30 грошей місячно,  
80 „ квартално,  
1.50 „ полрочно,  
3 зл. рочно.

В Америці: 1 дол. рочно.

В Чехословакии:  
2 кор. місячно, 10 кор. полрочно,  
20 кор. рочно.

### Ціны оголошень:

Ціла сторона 120 зл.,  $\frac{1}{2}$  сторони 60 зл.,  $\frac{1}{4}$  сторони 35 зл.,  $\frac{1}{8}$  стор. 20 зл.,  $\frac{1}{16}$  стор. 10 зл.; оголошення малы за 1 мм. 20 гр., в тексті 30 гр., перед текстом 40 гр. При місячном и долгом оголошеню значна знижка.

Конто чекове Нр. 404.155.

## Чого учит нас процес в Совітах.

Политичным процесом, який переводит ся тепер в Москві интересує ся цілий світ, бо процес тот выказує наглядно, же комуністичный порядок не приносит и не може принести людям счастья.

Штобы добре зрозуміти ціль тых всіх процесов, які потягнули за собою сотні и тисячи жертв, треба конче представити собі

### господарче положенє Совітской Росии.

В той Росии, котра до часу войны была хлібовым шпихліром цілого світа, котра могла выкормити людей, жиючих на цілої земскої кулі, где в трактирнях не платило ся нич за хліб, котрого каждый мог їсти до волі за дармо, — в той Росии єст тепер нужда и голод.

Ніт в том нич дивного, бо всядиваль инде можна запровадити в чи 8-годинный день работы, але не даст ся того зробити при сельском господарстві.

На ґрунті мусит ся робити втотчас, коли єст час ку тому, — ґрунт мусит бити оброблений на час и землеплоды мусят бити также на час собраны аж и втотчас, коли бы ся пришло в том часі хлопу нич не спати. Иначе пропаде марно ціле господарство и поля покрывают ся буряном.

Так старати ся о господарство, так трудити ся на нем и недосыпати и недоідати, лем дбати, штобы все было добре и на час зроблене може лем властитель ґрунту, котрый знає, же за вложеный труд достане нагороду в формі добрых урожаєв. Чужи люде, — наняты роботники лем рідко сут так совістны, штобы дбати о добро своего господара. Переважно трафят ся так, же робят они лем так, штобы дождати ся вечера и зарплаты.

В Совітской Росии ніт праві совсем приватных ґрунтов. Ґрунт забрал ряд, котрый стал ся властителем всіх ґрунтов и поділил тоты ґрунты на дві группы господарств. Одну ґрупу творят т. зв. „совхозы“ (совітскы хозяйства), а другу ґрупу т. зв. „колхозы“ (коллективны т. зн. злучены хозяйства).

Перша ґрупа господарств (совхозы) єст утворена с давных маєтков камеральных и маєтков належачих передом до великих панов, а другу ґрупу господарств (колхозы) утворено через злученє ґрунтов належачих давнійше до

селян, котрым казано тепер разом робити, разом зберати и разом їсти.

Никто отже не має там нич, штобы было его выключном власностю, а все єст загальне, обще, для всіх и каждого. Каждє таке господарство достало своего управителя, котрый барз часто не мал понятия о сельском господарстві. Тот управитель выдавал приказы, а люде, давны властители ґрунтов, замінили ся тепер на звичных роботников, котры мусят слухати глухых и шkodливых часто заряджень управителя.

При введєню такого порядка достає одинакову заплату так тот, котрый не жаловал ся передом и робил тяжко от свиту до ночи, як и тот, котрый все обивал ся и ждал лем вечера. И оден и другой разом робят, разом збѣрают, разом ідят — отже никто не познат, кто планьше робит, а кто ліпше їст.

Результаты такого порядка в сельском господарстві не дали долго на себе ждати. В скором часі зменьшало ся небывало число коней, коров и иншого статку, бо бракло для скотины паши. По зменьшаню ся числа скотины не было чим навозити ґрунту и так в продолженю пару літ дошло до нужды и крайной біды на селі.

Повідам — на селі, — бо власти большевицкы заберают, што лем ся даст с села и вывозят до міста, так, же в містах єст ище пол біды, але села голодуют в полном змыслі того слова.

Не лучше вылядаєт и

### Промысл в Совітах,

о котром пише и слышит ся так много. Не даст ся заперечити, же поветали там в послідных часах величезны фабрыкы и предприятия. Побудовано величезну таму водну на Дніпрі (т. зв. „Дніпрострой“), повстали новы фабрыкы и цілы міста фабричны, переведено много сітей дорожных.

Все то дало ся легко зробити, бо Совіты мають безліч людского материяла, котрый мусит робити на таких условиях, які му подадут. Симпатыкы комуністичного порядка голосят, же там ніт безработных и што уж тот оден факт свідчит, же там єст лучше.

Тымчасом они забывают, або не хотят ска-

зати о одном, же там роботник, хоц робит, стоит значно планьше, як безработный в инших краях. У нас и в других краях безработным платят запомогы, нима опекує ся все население краю и власти и дбают о того, штобы безработному облегчити его тяжке положенє, а там роботник достає тилько, же ніт о чом жити, а вмерати трудно.

Сами фабрыкы также не розвивают ся так, як бы належало ся того сподівати. И ту также ніт нич дивного, бо фабрыка также не може бити зроблена на приказ. Кто звичайно давал початок великим фабрыкам в инших краях? А но инжинеры. Инжинер оден чи другой служил в якомси уряді, або при чужой фабрыці, там виділ неодна и неодного ся научил, ускладає кус грошей и хотячи сотворити свой власный варстат работы, закладає фабрычку.

Початкого така фабрычка была невелика, але ведена опытным практыком инжинером, розвивала ся с каждым днем и таким способом творил ся сильный, великий промысл, опертый на здоровых фундаментах знания и практыкы.

Тымчасом в Совітах зачали иначе. Там побудовали великы фабрыкы и цілы міста фабричны, не маючи власне инжинеров-практиков, бо тых або поубивали, або кто мог, то сам спасал ся бігством до чужих краєв.

Нич дивного, же фабрыкы тоты вылядають так, як человек без кырви, або як лампа без нафты. Користь с них невелика, а наоборот принесли они поважны втраты, бо в тых фабрыках попустило ся много материялу. Доказуют того численны тракторы, які лежат безужиточно и много, много инших выробов того промысла.

### Штож на того люде?

Населенє, смотрячи на того все, видит, же комуністичный порядок не приносит счастья, а наоборот стає ся причиною біды и нужды и починат выступати против того порядка. Повстають бунты на Украині и в других закутинах великой державы, будут ся недоволєня аж и в самой армии и у роботничой клясы.

Штобы спасати власну скору, Сталин, тот червеный цар и сатрапа поработченной Росии, прибігат к правдиво чортовескому способу. Он глядаєт виновников той нужды и находит их в своих найблизших сподвижниках и прияте-



лях, с котрыма разом ставлял фундаменти большевицкого раю.

Начинают ся аресты и засуды на кару смерти. Гынут оден за другим творцы революции и комунизма. Так гыне Зиновев, Каменев, Тухачевский и сотні других видных сподвижников кырвавого Сталина.

Сталин пече при одном огні дві печені. Населеню представляют тых людей, яко шкодников, котры стали ся причиною всіх несчастъ, якы упали на людей. Они, ведля урабяной опинии спричинили голод в России, через них выходят с фабрык планны товары, они спричиняют желізно-дорожны катастрофы, они стають ся виновниками, же здыхат скотина и т. д. иншима словами через них валят ся на людей всі несчастя и если бы их не было, был бы в Совітах „рай на землі“.

Штобы поддержати такой суд о оскарженных, не жалует Сталин и грошей и в часі теперешного процесу роздае ся предводителям работников и селян грошевы запомогы. Мае тото на цілі представити в очах людей Сталина яко доброго отца, котрый вынагороджат кривды, пополнены мнимо через оскарженных ничюдов. Таким способом хоче Сталин очистити в очах населения и себе и большевицкий порядок.

Сталин пече также и другу печеню при том самом огні, бо через розстріл видных коммунистов и давных сподвижников позбыват ся грозных конкурентов, котры могли бы счазом высадити его с диктаторского кресла и переняти власть в свои руки.

Того боит ся Сталин страшно, бо знае, же в том случае за жите его не дал бы никто ани зламанога гроша. Прото тыж ест для оскарженных безпощадный. Его тверде сердце не знае милосердия, а его кырвавы руки алчнут дальше кырви.

То сут причины, для котрых робит ся процес за процесом и мордуе ся тысячи людей.

**Чи тоты люде провинили ся,**  
трудно нам, живучим далеко, справдити. Може быти, же они видячи, же коммунистичный по-

## Австрия хоче захвати независимость.

Дня 24. лютого выголосил канцлер Шушник в австрийском парламенте бесіду, на котру со специальным зацікавленем ждала Німеччина.

По недавных великих событиях и звязанных с нима надеждах, мусіло наступити там велике розчароване. Канцлер выступил рішительно в обороні независимости и свободы Австрии. На сторожі независимости стоит правительство. Счеркнене Австрии с карты Европы ест не до подуманя.

Бесіда с Гитлером мала лем на цілі усунути трудности, якы высунули ся при выполнении угоды с Німеччином. Угода тота гварантуе однак независимость Австрии.

„Патриотичный фронт“, числячий около 3 милионы людей, ест ведля канцлера, наилучшим гваранциом независимости Австрии.

## Комунистичный заговор на Кубі.

Недавно выкрыто на острові Куба комунистичный заговор. Пляновали они бунт. В звязи с тым власти арестовали окого 30 коммунистов, а за 500 росослано листы. В том краю мусят быти каждого року розрухы.

рядок не веде к добру, хотіли тот порядок змінити и старали ся навязати звязь с народами других держав, а може лем были опасны для самого Сталина и не годили ся с его политыком и прото казал их Сталин уничтожити.

Так, чи иначе было, факт остае фактом, же **порядок комунистичный в державі не дае счастья людям, а наоборот валит на население всякы біды.**

Если было бы там добре, то всі были бы вдоволены и никто не выступал бы против тому порядкови, ани не старал ся глядати иншого бога. Отже сам факт невдоволения людей ест достаточным доказом, же комунистичный порядок не дае счастья и дати го не може.

Кырвавы росправы с опозыциом сут дальшим доказом того, же верховодам комунизма не ходит о добро краю, лем о тото, штобы рядити и удержати ся за всяку ціну при рядах, хоц бы пришло вырізати и половину населения. Най ліе ся кров потоками, най гынут и пропадают тысячи людей, лем бодай они жили собі роскошно на богатом Кремлі.

### Штож стае ся тепер ясне.

Подумавши над тым всім стае ся ясне, же Сталину и его поплечникам не ходит о добро и счастье работников и хлопа, але о свои власны выгоды.

Же ніт там безработных, то нич дивного, бо одных жене ся, як худобу до работы, а як бы не можна было найти для всіх работу, то найде ся инши способы позбыти ся безработных. — спровокуе ся бунт и выстрелят ся их як бішены собаки.

Таким способом отправят ся их в тот ліпший світ, где ніт ни скорби, ни печали, но жизнь безконечная... и удержуве потребну пропорцию меже запотребованем рабочих рук и глядаючима работы.

„Совітский рай“ отже, о котром мріют гдеякы, не ест раем, — с Совітов однак найлегче достати ся до раю на другом світі.

## Франция за независимостью Австрии.

Помимо внутренних хлопотов, Франция дбае о свою оборонительну силу. Правительство ухвалило додатковы кредиты на вооружене в высоті понад 3 миллиарды франков, коли довідало ся, же уступил англицкий министр заграничных справ Иден и в результате того зазначила ся певна зміна в европейской политыці.

Уступлене Идена ослабило сильно Лигу Народов. Крім того зближене ся Англии до Италии ест для Франции факт незвычайно важным.

Прото тыж наряды в парламенте над внішном политыком были оживлены. Перебивала в них забота о том, яку дорогу мае избрати Франция, с кым мае ся лучити. Наконец рішено оперти ся о Лигу Народов и о союз с Англием.

Пакт с Совітами Франция хоче удержати и жадат льояльного додержаня того пакта со стороны Совітов. Франция буде боронити независимости Австрии, а также независимости Испании для удержаня равновагы в Европі.

**Чи дал ты уж жертву на Руску Бурсу в Горлицах? Если ні, то зроби тото, як найскорше!!!**

## Венгрия не хоче у себе гитлеровцов.

Венгерскы власти ствердили, же т. зв. партия „Народной Воли“, розвязана минувшого року за намірене выкликати бунт, розвиват дальше свою діяльність под назвом: „Венгерской партии народно-социалистичной“.

С порученя министра внутренних справ полиция запечатала бюро и зарядила присмотр над 72-ма людьми, котрых подозревают, же належат до той партии.

## Край национальной свободы.

Краем, где всі национальности тішат ся полным языковым свободом ест Швайцария. До тепер в Швайцарии были признаны три языки, яко урядовы, а именно: французский, німецкий и италиянский.

Тепер признано также урядовым языком язык рето-романский. Ест то язык, котрый выводит ся со старинной народной латины. Языком тым бесідуе всього лем 43 тысячи людей в кантоні Гравбинден и в гдеякых закутинах Тыролю.

Помимо того в зарядженном в той цілі плебисциті, який переведено под конец лютого, голосовало за признанем того языка, яко урядового подавляюще большинство швайцарского населения.

Швайцария здае собі справу с того, же ей сила ест в равных правах всіх народов, якы там живут.

## Война на Далеком Выході.

Дотеперешный комендант японских войск ген. Матсуи, котрого до недавна уважали всі за народного героя, ест откликанный, а его місце занял ген. Гата. Пануе переконање, же стало ся так, штобы утишити чужи державы, до котрых Матсуи относил ся вражо и мало политычно.

В послідном часі на фронтах дае ся зауважити усилену діяльність аероплянов. Кытайскы летчики бомбардовали остров Формозу, а японскы — великы кытайскы міста. Сухопутна армия японска ввошла уж до провинции Шанси. На одной ріці артиллерия затопила „джонкы“ (лодки) с 4-ома тысячами кытайских вояков.

## Выкрыто шпьянство в Америкі.

Американскы войсковы власти выкрыли широко розвинену групу шпьянов, котра, як доносят газеты, передавала одной чужой державі пляны фортыфикации Панамского канала.

Арестовано много людей, особенно в Нью-Йорку. Коменданты войск думают в виду такого положеня змінити плян обороны портов: Нью-Йорку, Бальтиморе, Бостону и Панамского канала.

Ходит особенно о Панамский канал, котрый на случай войны ест морском дорогом о великом значеню. Канал тот находит ся меже Америком Полудн. и Полночном и ест в посіданю Злученых Держав Ам. Полн. Она тыж буде рішати, кого можна в часі войны перепустити через тот канал с Океана Атлантичского на Океан Великий.



## Як будувати стайню для коров.

По ярих роботах буде ся в каждом селі по пару хат и господарских будынок. Кто призрїл ся будові новых домов, тот спостерет напевно, же новы хаты по большой части отвічають вимогам санитарным.

Сут они достаточо высокы, о великих, отвераных окнах, маюť отже дост світла и повітря. Если прировнати их до старых курных хыжок, то сут то правдивы палаты. С того видно, же люде стали ся больше выбагливы и хотят жити чисто и приятно.

Таксамо на певно хотїли бы мешкати и наши коровы. Им потребне ест также світло, свіжий воздух и чистота, лем же они не уміють того сказати и людам ся здає, же они сут и теперешном стайньом вдоволены.

Будуюť отже люде стайні и тепер так, як будували их діды и прадіды, — низкы, темны, душны. В таких стайнях дусит ся худоба и аж и при доброй папі ест слаба и невесела. Она выгледат так, як человек, держаний в криминалі, што в нем нїт ни силы, ни кырви.

А преця стайня ясна, продувна не коштує больше, як и темна и душна, треба лем при будові подумати о том, штобы ю так урядити, штобы и хлопцу выгодно было коло худобы походити и штобы худоба чула ся в стайні добре.

Місце под стайню повинно быти сухе, положене на горбку и на ґрунті, котрый не перепущат воды. Найліпше ест звернути двери стайні в сторону ку входу, бо втотчас в літі в стайні не ест горячо и душно. В стайні повинно тримати ся лем коровы, а для другой худобы повинна быти отдільна стайня.

Яко материал на будову стайні надає ся найлучше дерево. Стїны маюť быти грубы на 10 см. Стїны стайні от середины білены валном. Повала збита с дощок, на котры належит дати верству глины с січком грубо на 10—15 см. Втотчас через повалу не буде тягло и не буде ся скрапати пара.

Окна давати от стороны сонечной, над головами коров на высоті 2,20—2,30 метра, штобы світло не разило коров в очи. Величина выгледов повинна быти:

в стайнях на 5 коров — два окна, кажде о вымірах 0,80×1 метр;

в стайнях на 10 коров — три окна, кажде о вымірах 1,20×0,80 м.;

в стайнях на 15 коров — пять окон, кажде о вымірах 1,20×0,80 м.

Окна повинны быти отвераны, штобы можна было стайню провітрити.

Двери великы, отвераны на двор (2,30×1,70 м.). Найотвітнійша температура в стайнях ест 12 градусов Цельсия. Важне ест, штобы

было в стайні все одинаково тепло, бо всякы зміны температуры отбиваюť ся эле на молочности коров.

Стайня повинна мати вентиляторы, котры легко зроби́ти в формі двох коминов с дощок. Один комин зачинат ся от повалы и сягат по каленицу даху, другой мусит быти впуццены на яке 30—50 см. ниже повалы.

Першим отходит сопсуге повітре со стайні, а другим доходит до ней свіжий воздух. При коминках повинны быти засувы. Дылины было бы найліпше зроби́ти с бетону, або с цеглы укладаной на кант и заляной цементом. Але же тот материал треба купити, а у нас люде маюť свои лісы, протом можна также зроби́ти дылины сосновы. Спад має выносити 2 см. на 1 метр, так, жебы коровы стояли кус выше передныма ногами, як задами.

Выміры такой стайні будут: высота 3 метры, долгота становиска — 2,20 м., ширина корытара 2 метры, ширина жолоба 0,70 м. Высота жолоба от землі 0,30—0,50 м., глубина жолоба 0,20—0,25 м. Корытар може быти и узший (на 1,50 м.) а зато дати 50 см. широкий отступ меже жолобом и стїном, штобы легче было задавати пашу.

В так урядженой стайні даст ся удержати чистоту. Буде в ней мило и тому, кто ходит коло коров, бо буде она ясна, тепла и несмердяча.

## О бесплатну ветеринарийну помоч для селян.

Обще Собрание „Малопольского Т-ва Рольного“ ухвалило одноголосно звернути ся до Министерства Рольництва и Реформ Рольных в справі бесплатной помочи ветеринарийной для селян через повітовых лікарей ветеринарии, або, штобы рольны организации не мали нияких перешкод со стороны административных властей, если захотят потворити гнізда лікарей ветеринарии выключно для себе и за власны фонды.

## Фосфор, то важный кормовой складник для рослин.

Каждый с нас знає, же на наших ґрунтах поправили ся урожаи аж втотчас, коли люде почали сіяти жужлі. На жужлях родили ся прекрасны коничи, а в коничисках удавал ся добре овес и люде хрихдили до хліба и до худобы.

Невозможность достаня жужлей в часі войны и по войні спричинила, же господарства упали и ґрунт выяловїл. Тото доказує наглядно, же в жужлях ест якаси пожива, потребна конче рослинам. Тым кормом ест фосфор, без котрого рослины не могуť ся добре розрастати. Фосфор спричинят, же зерно стає ся грубше и тяжше, впливат користно на загальне розвите рослин, причинят сз до сильнійшого закорененя, а также поведує, же рослины кеповалують ся.

Особенно потребный ест фосфор при коничах и других мотыльковых рослинах, бо впливат на их сильнійший розрост, што знова дає возможность, же притїгаюť они больше азоту с повітря, через што земля богатит в другой важный кормовой складник — азот.

Додаване фосфору в виді штучных навозов ест у нас тым потребнійше, же в навозі

стаенном ест взагалі мало фосфору, бо фосфор магазинує ся переважно в зерні, а зерна сїдат мало худоба, отже и в навозі ест его мало.

У нас относительно мало уживат ся фосфоровых навозов. Причином того явят ся факт, же на поли не видно так сильно діланя фосфору, як діланє азоту. При ужитю навозов азотowych травы и зерна вырастаюť высокы и видно дораз его діланє, а тото, же ґрунт ест справлений навозом фосфоровым, покаже нам аж молотильня и млынок.

Але тото не повинно нас отстрашати от купна навозов штучных фосфоровых, а наоборот заохочати, бо в господарстві потребуєме в першой мірі зерна. Маючы дост зерна, будеме мати хліб для себе и худобы.

Тепер нїт жужлей в торговлі, але зато ест у нас ліпший от жужлей суперфосфат. Его повинно сіяти як найбільше кажде господарство, если хочеме, штобы оно розеввало ся належито.

## Што робити в марті.

В марті быват всіляко. Раз погода, раз дождж, то знова сніг, мороз и так доокола. От погоды отже зависит, што можна робити в марті.

Если ґрунт осушит ся, то каждый знає о том, же треба ити в поле, орати, сіяти и боронити. Властиво поля повинно ся орати в осени, не на весну, бо втотчас и ліпше скыбы ся розлежат и земля не пересыхат так скоро, што має великий вплив на розрост рослин, особенно втотчас, як весна ест суха.

Але кто не сорал поля в осени, тот мусит зроби́ти тото на яр. Першом однак ярном роботом повинно быти засїанє озимин коничами. У нас робят тото звичайно поздно и протом пропадаюť нераз коничи, бо коли ґрунт высохне, насїне коничу не чипят ся землі и не килчит, лем высыхат, а засїанє вчас на яр, коли земля ест мокра, килчит и закоренят ся скоро. Протом тыж не можна той роботы откладати.

Пильном роботом ест также поборонєне лук пасовиск и прошлорочных коничиск, причом належит росшмарити кретовиска и зровнати ґрунт. Также вчас на яр треба позберати каменї, а тых ест у нас доволї, и уложити в призмы, найлучше при дорогах, штобы их пак добре было вывезти.

В садах переглянути деревка и памятати, же ест то послідный місяц, коли можна садити деревка. Выбрати отміны, надаючы ся до горского климату и до ґрунту. В той справі найліпше буде звїдати ся о раду инструктора садового, який ест при каждом повітовом выділі.

Конї и волы кормити интенсивнійше, бо где их тяжка работа в часі весны. Если не зроблено того вчаснійше, то тепер ест послідна пора дополнити и направити плугы, бороны и инши рольничы знаряды.

**Новы аресты в Москві.** В Москві кружат упорны поголоскы о том, же арестовано маршала Егорова, Белова и Дыбенку. Дыбенко має находити ся уж в арестах на Лубянци. Где находит ся Егоров и Белов, не знає никто.

Также говорят, же маршал Ворошилов попал в неласку. На его місце має прийти его заступник Федко. Также судьба марш. Буденного ест непевна. Он уж давно был виджений немилу через Сталина, а тепер кружат поголоскы, же Сталин хоче и его ся позбыти.

## Побіда националистов в Испании.

Послідны часы приносяť незначны побіды национальным войскам. Опановали они такы місцевости, котры от початку войны находили ся в руках республиканцов.

Найзавзятїйши бои вызвали ся на вхосид и полудне от Теруель, переважно в горах. Позыци в горах были особенно сильно укріплены через правительственны войска. До неволї достало ся около 1.000 милициянтов.

Особенно оживлена ест діяльність повстанчих самолетов, котры непокоят бомбами неприятельскы силы. Правительственным силам морским посчастлило ся затопити один военный корабель, належачий до войск повстанчих.



## Што чути всвіті и в краю

**Великий бой в Палестыні.** Меже англицкыма войскама и арабскыма террорыстами пришло до великого боя, котрый продолжал ся два дні. Террористи оперовали малыма отділами, што позволило им в пару місцах передерти ся через с'ужаючий ся чимраз больше перстень англицкых войск и перекрочити границу Трансйордани.

Втраты арабов выносят 80 забитых и много раненых. В Палестыні думают, же бой тот, найбільший от часу безпорядков, буде рінати в акции давлєня террорыстов.

**Негус має вернути до Абисынии.** Газеты англицкы доносят, же Муссолини має предложити негусови Гайле Селясиє, штобы он вернул на престол абисынский. Условия обнятия престола маюти быти слідуочи:

1) Негус буде панувати над пространством, обнимаючим 1/4 част цілой Абисынии;

2) Місцем пребываня має быти Аддис Абеба;

3) Италия має ему платити 10.000 фунтов штерлингов рочной пенсии;

4) Негус має признати верховодство Италии и выступати, яко васаль короля итальянского и цисара Абисынии.

Англицкы газеты подаюти, же посередничити меже негусом и Муссолиним має англицкый министр заграничных справ Галифакс. Причином такого кроку має быти факт, же Муссолини не може переломити опору абисынцев, котры нищат дороги и земледобы и уважат, же оден негус може положити конец тым безпорядкам. В дипломатычных кругах думают, же негус згодит ся на то предложєне. Запытанный о то негус заявил, же не намірят скористати с той пропозыции, бо он чує ся независимым монархом того краю и с отзысканя того краю не зрезыгновал ани он, ани абисынский народ.

**Террорысты с О. У. Н. перед судом.** Дня 7. т. м. перед судом в Золочєві станули члєны О. У. Н. — 23-літний Илярион Крук, 28-літний Владимир Качор и 24-літний Петро Цыца, оскаржены о того, же разом с убитым Иваном Майба убили Мечислава и Марию Ясинских, властителей земского маєтку в Белзах.

Убийство мало місце 6. мая м. р. Бандыты, подаючи ся за полициянтов, достали ся до двору и заявили, же маюти поручєне перевести ревизию в дворі и допроводити Ясинских на постерунок Держ. Полиции в Скавині.

По дорозі до Скавины бандыты убили Ясинских, и вернувши до двору, зрабовали гроши и 2 револьверы. Повідомлена о убийстві полиция зарядила за нима погоню, в часі котрой был убитый Иван Майба. Инших арестовано аж по долшом часі.

Кромі оскарженных о убийство станули перед судом также тоты, котры крыли у себе убийц. Сут то: Ярослав Дзядына, Василь Гелап, Владимир Иванов, Григорий Дзядына и Андрей Майба.

**Жие с пробитым сердцем.** В Парыжі мал місце цікавый случай операции. Оден безработный, находячи ся в біді, пробил ся ножем, графяючи в сердце. В результаті того сердце перестало ділати. Раненого отвезено до шпиталя и поддано операции. Оперовало трьох лікарей. Удало ся им сошити сердце и переведено трансфузию кырвы (вляли му до жил кров со здорового человека).

Операция тягла ся цілу годину. По переведєно тых средств сердце почало бити. Недошлый самоубийца приходит позволи до здравя и єст надежда, же выздоровіє совсем.

**Политычны вязні будуют кріпость в Ленинграді.** В Ленинграді (давном Петрограді) приступили совітскы власти до будовы кріпости морской. Спроваджено там тысячи работников, котры приступили уж к вступным работам земским. Большинство работников — то политычны вязні. Для удержаня в тайні будовы кріпости — зликвидовано в Ленинграді консуляты чужих держав.

**Тысячны паломництва до Чайкович.** В Чайковичах коло Самбора мал появити ся на шибі одной хаты рысунк Матери Божой. Тот росповіл властитель хаты и от того часу с найдальших сторон тягнут там тысячи богомольцов. Денно приїзджат до Чайкович около 4 тысячи людей, а в день Стрїтєния было их там около 10 тысяч. Уж далеко от Чайкович видно на дорогах толпы паломников.

Село Чайковичи числит 2.000 людей. Явлєне то не єст до тепер розслїджене. Заходит обава, чи не єст то звычайне цыганство.

**Вымордовал цілу родину ген. Козицкого.** Недавно, користаючи с того, же ген. Козицкий выїхал на пару дней до Варшавы, ордынане генерала Бролислав Ясинский, родом с Лодзи напал в ночи с сокыром и убил жену генерала, его 5-літну дівчинку, бону той дівчинки и кухарку и обработал ціле помешканє. Мало то місце в Скєрневицах. На другый день рано сказал сусідам, же генералова и всі домашны выїхали до генерала до Варшавы, позатыкал оконницы, замкнул на ключ мешканє и выїхал поїздом. По пару днях вернул генерал и застал цілу родину убиту и мешканє обработано. Повідомлена полиция впала на слїд бандыта и окружила его в хаті его тещи в Гуті Куфлевской коло Мазовецкого Мінска. Преступник, видячи, же полиция окружила со всіх строн хату, почал стрілати до полиции, кулі однак стбивали ся о сталевы тарчи, в які заосмотріла ся полиция. Видячи, же не вырве ся с рук полиции, бандыт забил себе послїдном кульом, яку мал в револьвері. Его жену арештовано.

**600 моряков втопило ся.** Рядовы испанскы войска сторпєдовали военный повстанчий корабель „Балеарес”. Як доносят англицкы газеты на кораблі том было 600 моряков, а также адмирал, капитан корабля, комендант и

много высших офицєров. С того числа спасло ся всего лєм 200 моряков, а рєшта то єст 600 моряков и офицєры втопили ся разом с занурившим ся в воду кораблем.

Причином так великого числа жертв єст то же помимо остережень, даваных через инши кораблі, большинство находячих ся на кораблі моряков не сходило с корабля, хоц было дост часу, бо корабель через 2 и пол години тримал ся ище на поверхні воды.

**Страшне наводнєне в Калифорнии.** Тяглы дожджи спричинили в Калифорнии страшне наводнєне, котре вырядило небывалы втраты в людях и маєтку. Ведля обчислєнь згинуло в воді 250 людей; с того выдобыто тіла 70 людей, а розпознано лєм 16. Перешло 20 тысяч людей находит ся без даху над головою. Маса місцевостей єст цілковито отрізана от світа и позбавлена звязи с другыма місцями.

**Основанє касы безпроцентных позжичок для селян.** В повіті новосандєцком закладаюти в многих селах касы безпроцентных позжичок для селян. На засіданю Рады гминной, отбытом дня 8. марта в Крыниці Сєлі, ухвалєно одноголосно основати отділ той касы у себе. Діло вартат того, штобы всі села приступили до той акции, бо єтотчас в потребі може ся каждый поратовати безпроцентным кредитом

В неділю дня 20. марта о 3-ой годині по полудни отбуде ся в Мацины Великой в домі  
**МИХАИЛА ЖЕЛЕМА**

## ОТКРЫТЄ ЧИТАЛЬН

им. М. КАЧКОВСКОГО,

на котре члєны основателі запрашаюти весь населєне Мацины Великой и людей с доокрєстных сєл. Передовсем звертаєм ся до молодежи, так дівчат як и хлопцов не жаловати труда и прийти на открытє нового отчала культуры и просвіщеня. Также просимє нашу интеллигенцию и старших загостити до нас в тот торжєственный для нас день.

Члєны - основателі.

**МОЛОДЫЙ** с добром практыком организатор-инструктор хора церковного и світского добрый режисєр, руководитель культурно-просвітительного житя читальні глядат занятя.

Условия по договору.

Адрес: Крыжановский Михаил, Бобрна почта Лобозєв, пов. Лєско.

## Комунальна Каса Ощадности Повіта Краковского в Кракові

Рок основаня 1882.

ЦЕНТРАЛЯ КРАКОВ, УЛ. ПИЯРСКА 1.  
тел. 115-97, 131-73, 101-03.

Отділєня: К Р Ы Н И Ц А, тел. 112.

В Е Л И Ч К А, тел. 6.

Всі поручєня входячи в область банковости.

ПОРУЧЄНЯ ДЕВИЗОВЫ  
ПОРУЧЄНЯ БИРЖОВЫ  
СХОВОК АВТОМАТ.

СУМА ВКЛАДОВ ПОНАД 35.000.000 ЗЛ.  
МАЄТОК ВЛАСНЫЙ ОКОЛО 6.000.000 ЗЛ.

БЕЗОПАСНОСТЬ.

ДОБРЫЙ ПРОЦЕНТ.